

13
J. N. J.

DISSERTATIO ANATOMICA
DE
GLANDULA
PINEALI
LAPIDESCENTE,

Quam
DIVINIS SUB AUSPICIIS,

PRÆSIDE

DN. JOHANNE SALZMANN,

Med. D. Anat. & Patholog. P. P. Ord. Capit.

Thoman. Canon, Sui Ordinis h. t. Decano

Spectabili,

DNO. PATRONO ATQUE PRÆ-
CEPTORE SUO OMNI OBSER-
VANTIA COLENDO,

*SOLENNI ET PLACIDÆ DISQUISITIONI
SUBMITTIT*

JOH. BAPTISTA KARCHER,
Selestadiensis.


Ad Diem 2⁵ Mensis Novembr. M DCC XXXIII.

Hor. loc. fol.

ARGENTORATI,

Typis JOANNIS FRANCISCI LE ROUX, Almæ Universit. Cath. Typogr.

DEO,
PATRIÆ,
PARENTIBUS
ATQUE
AMICIS.



PRÆELOQUIUM

TOTO id die evenire videmus, ut magnitudine res æstimentur, nempe mole grandiora omnium oculos invitent, inque sui admirationem rapiant, quæ verò exigua sunt, sùsque déque habeantur. *Miramur, notante Plinio, tur- rigeros elephantum humeros & truces in subli- me jactas tigrium rapinas, leonum jubas.* Quod si verò corpora naturalia paulò atten- tiùs consideraverimus, deprehendemus na- turam nullibi magis quàm in minimis totam esse, seu, quod aliàs dici assolet, Deum esse magnum in magnis, & maximum in mini- mis. Quod ipsum de homine verum esse nemo facile inficiabitur, qui, si cum Ma- crocosmo comparetur, mole quidem par- vus dicendus est, nihilominùs Microcosmus seu mundi majoris epitome ab Antiquissimis

appellatus ; utpotè in quo infinita Creatoris Sapientia universam rerum naturam velut in imagine expressit. Idem luculentius elucescit è solerti innumerarum ejus partium scrutinio, quæ non solum structurâ atque usu, sed & magnitudine multum inter se discrepant. Harum quippè autopsia non obscure comprobatur, exiguis naturam machinis magna plerumque opera moliri, seu, ut *Seneca* verba, quæ *Quæst. Natur.* de mundo appositè enunciavit, paululum mutata nostra faciamus : *pusilla res homo est, nisi in illo, quod querat, omnis homo habeat.* Proinde cum exiles etiam partes in corpore nostro parvi ducendæ non sint, quin potius magnâ attentione dignissimæ, non inutilem nos operam navaturos esse confidimus, Speciminis Academici loco de exiguâ illâ Glandulâ, ob figuram Pinealis dicta, pauca quædam in medium proferre. Cui labori qualicumque ut Divinum Numen benedicat, enixis ab eo precibus contendimus.



THESIS I.



E Glandula Pineali, ejusque constitutione præternaturali dum quædam commentari animo constituimus, qualemcunque nostrum laborem à consideratione ejus anatomicâ ordiri fas est, eoque magis, quò magis mos hactenùs receptus obtinuit, ut de corporis humani viscere, vel parte præternaturaliter constitutâ acturi descriptionem anatomicam qualemcunque præmittant, quem ordinem & nos secuturi de nomine pauca quædam prælibabimus. Glandula nostra pinealis NOMEN accepit à similitudine & figurâ, quam cum pini fructu turbinato communem habet, de quâ inferiùs plura dicemus. Græcis *Κωνάριον* vel etiam *σῶμα Κωνοειδές*, id est, corpus coniforme à coni figurâ appellatur. Veterum schola hanc partem æquè ac alias quasdam obscæno nomine indigitavit, eam Penem cerebri vocando, de quo non nostrum, sed *Malpighii Professoris quondam Bononiensis* judicium allegare liceat, qui in *Exerc. Epist. de cerebro, templa, inquit, olim marmoribus distincta, auro, picturis, catervisque*

risque humani ingenii artificiiis nitida & ditata construere solebant Aegyptii, horum tamen intima, post tot impensos labores ridiculum occupabat Numen, simia scilicet, hircus & cæpa, unde cæsit in adagium: Aegyptium templum. Non absimile, ut sæpè per jocum inculcabat Andreas Marianus, æterna memoriæ Præceptor, antiquiores Anatomici in celsiori animalis parte, capite scil. cerebrum substruxere; Sensuum enim undique organis stipatum, osseo cranio, meningibus, vasorum mirabili inducto plexu, nobile diceres conditum templum: Si autem requiras, quid sub tot concamerationibus in tripode colendum occurrat, non tam ridicula, quàm obscæna reperies, de quibus cum Hoffmanno meminisse pudet; nates enim, penem, anum, vulvam, & testes variis situatos locis admirandos finxere, totumque negotium in lustrandis & describendis sinibus & rimulis, illis faceſſebat, neglectâ interim cerebri mole, & intestinâ parietum structurâ.

THES. II.

His de Etymologiâ breviter præmissis, non tam DEFINITIONEM, quàm succinctam ejus descriptionem tradimus; est autem Glandula Pinealis pars cerebri glandulosa, retrò thalamos nervorum opticorum, ante nates & testes, in medio ferè cerebri locata, plexui choroideo firmiter connexa, exiguæ magnitudinis & substantiæ mollioris membranâ tenui cincta, seroque seu lymphæ sequestrandæ & transmitendæ dicata. Reperitur non solum in homine & quadrupedibus, (in lepore mira est & visu lepida) quin etiam volucres & pisces eadem præditi sunt: inde Thom. Vvilli-

Villifius Professor Oxoniensis Anat. Cerebr. cap. 14. concludi posse afferit, ipsam necessarii cujusdam usus esse. Illam quidem in sectione cerebri quandoque oculos fugere hinc indè observationes prostant, quare non pauci sibi aliisque persuasum iverunt, hanc Glandulam omninò defecisse, quia frustrà ab illis quæsitâ fuit; Sic in *E. N. C. Dec. IV. ann. 5. observ. 47.* à Cummio annotatum legimus, in hydrocephalo nullum hujus glandulæ, ut & pituitariæ vestigium apparuisse. Conf. *Dec. I. ann. 4. & 5. obs. 197.* Item *Thom. Kerckringius Spicil. Anat. obs. 35.* in puero 14. annorum stulto quasi, semper somnolento & capite obtuso, Glandulæ Pinealis nè vestigium quidem naturam elaborâsse refert, additis his verbis: Se nihil nisi quod vidit & tetigit, aut alio sensu percepit, in medium proferre. Conf. *Boneti Sepulchr. Anat. l. I. Sect. 10. obs. 5.* Sed non sine ratione dubitatur, an reverà defuerit, vel an non inter disseccandum loco mota, aut cum plexu choroide ablata, aut aliâ de causâ deperdita fuerit; cui dubio ansam præbent iidem corporis humani Indagatores, qui ejus defectum nobis exhibent. *Matth. Paisenius E. N. C. Dec. I. ann. 4. & 5. obs. 197.* in hæc verba erumpit: nescio an errore dissecta aut ablata fuerit, & *D. Joh. Adam Kulmus Medicus & Anatomicus Gedanensis Solertissimus in Miscell. Curios. Uratislav. Tentam. 22. art. 13.* perhibet, se in scrutinio cadaveris in aquâ suffocati glandulam pinealem omni adhibitâ diligentia & cautela nullam intueri potuisse, membranâ verò crassiore, quâ partes vicinæ præter morem obductæ erant, remotâ, se eandem, sed extraordinariæ exilitatis

ratis deprehendisse; nec mirum, dudum quippè *Thom. Villisus loc. cit.* advertit, illam in hydrope cerebri loco suo dimoveri, radicibus à nimio madore laxatis & non rarò abruptis; cui accedit, quod *Ill. Lancisus Diss. de Sede Cogit. Anim. p. m. 308.* eam nunquam deficere statuit, & qui eam aliquandò planè defuisse scripserunt, certè præ summâ, quæ interdum occurrit, exiguitate, aut illam secantes abraferunt, aut negligentes præterierunt.

THES. III.

Sita est Glandula nostra retrò Thalamos nervorum opticorum, interposita natibus & foramini, quod ad quartum ventriculum ducit, super prominentiis nates modò memoratæ atque testes dictis, quibus præfixa est, quasque de re anatomicâ præclare meritis *Winslous Exposit. Anat. Tr. de capit. §. 82.* tuberculorum quadrigeminorum nomine insignivit, in convalle communi, quibus corporibus à cerebro prodeuntibus innititur: vid. *Frid. Ruysch. Thes. Anat. I. pag. 27.* mucrone suo sursùm seu potiùs antrorsùm spectans, basi verò cerebri substantiæ incumbens; præponitur posteriori quarti ventriculi meatui seu canali, qui ad sinum principio spinalis medullæ insculptum ducit ex mente *Joh. Veslingii Syntagm. Anat. cap. 14.* & posticæ atque latiori fornicis parti appenditur, cineræque substantiæ natibus intermediæ insidet, atque unitur suprâ foramen, quod Ani nomine donatum est, vasque venoso ad sinum quartum tendenti supponitur. Prætereà illam peculiari ratione ei potissimum tractui medullari, qui transversus ducitur

ducitur ante natiformes protuberantias continuari annotatum legimus in *Jll. Morgagni Advers. Anat. VI. animadv. 9.* Non verò in centro cerebri locata est, uti Ren. Cartesio videtur, utporè ejus oculos præconcepta opinio fefellit, ut alio sitam modo & loco eam videret, quàm alii peritissimi Profectores, quos inter est Nic. Steno, vid. *Hist. Morb. Vratislav. Collect. Tr. de experient. cap. 2.* quin potius magis in posteriore cerebri parte residet, si longitudinem dicti visceris spectes, magis verò centrum occupat si ejus latitudinem consideres.

THES. IV.

E dictis aliquo modo patet glandulæ nostræ connexio, quæ posticæ fornicis parti appenditur, juxta foramen ani nomine donatum, & cinereæ substantiæ natibus intermediæ insidet, quibus ope diversarum radicum fibrosarum jungitur, vid. *Ridley Anat. cap. 9.* quarum duæ sunt substantiâ medullari præditæ, atque fibras exiles, nè dicam exilissimas referunt, quas alii Pedunculos appellant medullares & candicantes, quibus etiam infernæ thalamorum nervorum opticorum sedi connexa est: illi propè glandulam sibi propiores existunt, versùs dictos thalamos verò magis à se invicem recedunt, vid. suprà laudatum *WVinslouw loc. cit.* hosce pedunculos in brutis manifestiùs apparere autopsia docet. Potissimùm verò considerata est glandulæ hujus connexio cum plexu choroideo è tenui meninge & infinitis vasculis sanguiferis conflato, qui eam omninò obtegit atque occultat ita, ut non nisi remoto illo in curioso-

rum oculos incurrat, & quam maximè à vena per medium plexum decurrente, cui reliquæ dicti plexûs venulæ sanguinem suum infundunt, velut à fibula atque clavo suspenditur, vel potius portionem plexûs choroidis ibi sitam sustentat. Huic plexui ita firmiter connectitur, ut saltem in homine facilè cum illo à cerebri substantiâ, cum quâ parùm cohæret, avellatur. Vid. *Diemerbr. Anat. lib. III. cap. 6.* quam ob rem in cerebri dissectione, ni blandâ ille & cautâ manu removeatur, glandula vel simul abripitur, vel saltem locò dimovetur, uti omnes illi, qui cerebri dissectioni & demonstrationi operam suam dederunt, plus unâ vice experti sunt, unde etiam est, quod quemadmodum suprâ §. 2. innuimus, illam omninò defuisse creditum est, quam cautelam etiam *Phil. Verheyen, Professor quondam Lovaniensis* Professoribus sedulò inculcat, si illam debito in loco atque situ naturali curiosis eorum spectatoribus demonstrare velint, quia leviùs cum cerebro cohæret. Pedunculi quippe illi, quorum modò mentionem fecimus, quosque laudatus Winslous quandoque duplices esse asserit, atque ad testes pertinere perhibet, exiles sunt atque molles, eique in situ continendæ longè impares; ut taceam, *Casp. Bauhinum* ejus cohæSIONem cum cerebri substantiâ prorsùs negare.

THE S. V.

Magnitudinem ejus quòd spectat, exigua illa est in subjectis humanis, in plerisque brutis, imprimis ove & vitulo major, habitâ etiam corporis proportionem. vid. *E. N. C. Dec. 17. ann. 4. obs. 156.* uti in milvo & *Dec.*

II. ann.

II. ann. 2. obs. 29. in ove & vitulo. *Diemerbræk Anat. lib. 3. cap. 6. & Dionis Anat. demonstr. VII. pag. 518.* addunt rationem, ob quam in hominibus adeò exilis sit, quia calentia eorum cerebra aperire nefas est, unde in inveteratis cadaveribus eam colliquatam vix apparere; id quod etiam ex analogiâ probant, quâ in recens mactatis animalibus major quàm diù post observatur: addit *Th. Bartholinus Anat. lib. 3. cap. 6.* illam ferè annihilari seu colliquari, sicut camphoram aëri expositam, atque resolvi, sicut sal ab humido, frigido verò expositam flavescere: id quod *Thom. VVarthono Adenograph. cap. 23.* non omninò arridet, quin potiùs arbitratur, eam aëri expositam ideò imminui, quod liquorem, quem continebat, in venam proximam, cui annectitur, exoneret. Hoc autopsia probat, quod pisi vulgaris magnitudinem ordinariè exæquet, imò etiam minor sit. Vid. *Munnicks lib. de Re Anat. §. 53.* quin etiam, uti rectè judicat *Joh. Mar. Lancisius diff. cit.* ejus magnitudo multùm variat, id quod tùm de statu naturali, tùm, & quidem maximè de præternaturali intelligendum esse censemus. Extraordinariam & p. n. vid. *Act. Lips. 1696. pag. 203. Henr. Ridley Anat. Cerebr. cap. 10.* eam tumefactam & usque ad molem triplo majorem in hydropico pueri cujusdam strumosi cerebro vidit. *Joh. Bapt. Contulus Phil. ac Med. Doct. Bonon. Tr. de lap. podagr. & chiragr. in corp. human. product.* se eam magnitudine nucis avellanæ annotasse perhibet, & fidem ferè superat, quod à *Car. Drelincurtio* sibi communicatum esse perhibet *Mangetus Theatr. Anat. lib. IV. cap. 2. pag. 309.*

nempe eam ad ovi gallinacei amplitudinem excrevisse. *Conf. infra §. 13.* Uti autem quandòque solito major existit, ita interdum iusto minor conspicitur; & modò allegatus *Lancisus diff. cit.* in cerebro balbutientis & fatui post mortem dissecti, istam adeò exilem vidit aliisque demonstravit, ut cannabinum semen vix æquaret, cujus verbis hanc thesin obsignamus, quando ait: Glandula pinealis nunc magna, nunc pusilla est, imò paulò milii granum excedens.

THES. VI.

De FIGURA ut pauca quædam adjiciamus, est illa plerumque oblongior, &, uti supra dictum, nucleo pini turbinato similis, quæ tamen aliquandò, teste *Anton. Nuckio Epist. de Invent. Nov.* nunc magis pyriformis occurrit, sæpè ad sphæricam, non rarò ad ovalem figuram accedit, cum quo apprimè consentit accuratissimus corporis humani Scrutator *VVinslous l. c.* ejus figuram irregulariter rotundam asserens, & *Lancisus loc. cit.* plerumque conicam, aliquandò sphæricam ei figuram adscribit. Durities seu potius mollities pariter differt, prouti lympa magis minùsve scatet, qualis magna sæpè copia sacram Palladis arcem inundat, aut cerebrum hominis, è quo desumpta est, expositum aëri, vel corruptioni magis obnoxium jam fuerit, tactui plus minùsve renititur. Hoc apud omnes in confesso est, hanc glandulam, de qua agimus, æquè mollem esse ac plerasque alias partes in cerebro reperiundas, nempe in statu naturali, quod si verò arenulas aut aliam substantiam duriusculam in sinu suo fovet, conjectu facile est, corp-

puscula hæc heterogenea majorem ipsi duritiem conciliare, quâ de re infra plura dicemus. Uti autem modo recensitæ ejus conditiones, ita pariter color quandoque discrepat, ille subcinereus ordinariè in-
tuentibus se offert, nonnunquam magis subflavus, aut subluteus, pallidus, interdum subobscurus est, nunc etiam magis nunc minùs illa rubet; de quo rursùs allegare lubet *Ill. Lancis. Diff. cit.* qui conariam glandulam in superficie subrubram mirum in modum sanguineis punctis variegari animadvertit, quæ puncta vasculis sanguineis eorumque orificiis disruptis vel discissis procul dubio adscribenda sunt; pergit Idem, eam minimè præterquam in centro candicare, si per longum aut transversim eam secueris, sed remissè, rubere; unde non obscurè patet, corticem seu exteriorem ejus partem è corticali, interiorem verò minorem è medullari cerebri substantiâ conflatam esse; qui & animadversione dignum judicat, quod cum in reliquis cerebri partibus magna sit inter diversos homines similitudo, contrà in corpore calloso & glandula pineali magna dissimilitudo deprehendatur, è quarum partium dissimilitudine, concurrente sanguinis crasi vel dyscrasia, ut plurimùm nativam hominum indolem exoriri quoad judicia, consilia, deliberationes & ratiocinia suspicatur. *Ill. Morgagnus l. c.* in mulieris cerebro eam substantiâ cerebri corticali, cui sæpiùs fermè similem conspexit, longè albidiorẽ deprehendit. Naturâ suâ est opaca, sed à lymphâ vel sero ibidem contento & restagnante aliquatenus diaphana evadit. Hinc etiam in strumosi suprà citati ce-
B 3 rebro

rebro hydropico istam ratione lymphæ gelatinosæ contentæ transparentem planè extitisse observavit *Henr. Ridley loc. supra cit.*

THES. VII.

SUBSTANTIAM glandulæ hujus quod attinet ex molli & spongiosâ cerebro vix duriore compositam illam esse, consentiente autopsiâ, judicat *Joh. Munnicks de Re Anat. Thes. 53.* & accuratissimus Anatomicus *WVinslous loc. cit. §. 83.* eam de corticali cerebri substantiâ multùm participare perhibet, præter quod aliquid medullaris habeat eo in loco, ubi pedunculi à thalamis nervorum opticorum exporrecti eidem adhærent. Intùs porosa est & duriuscula quidem, sed citò flaccescit, & in cadaveribus humanis non nihil inveteratis colliquata apparet, præprimis in hydrope cerebri nimis flaccida reperitur. *E. N. C. Dec. III. ann. I. obs. 153.* quandoque etiam firmior est. Præterea à vero non aberrare nobis videntur, qui illam vulgò sic dictam glandulam esse, & quidem juxtà *Henr. Ridley Anat. cerebr. cap. 10.* ad conglobatarum vel lymphaticarum, secundùm alios verò ad conglomeratarum classem referendam esse asserunt, quia ope microscopii visa minimos glandulares utriculos exhibet. *Jac. Mangeto Theatr. Anat. Tom. II. pag. 309.* annotante, ex mente Malpighii ejusque Assessorum è multis minutissimis glandulis conflata est. Et *Ill. Morgagnus loc. cit.* intra ipsam quosdam quasi loculos & substantiam manifestè glandulosam vidit. Non minùs *Casp. Bauh. Inst. Anat.* eam glandularum plexûs choroidei maximam dixit, adeoque à conditione cæterarum, quæ in hoc plexu occurrunt, non differre vult. Quibus

bus contrarius est *Frid. Ruyschius Thes. Anat. I. pag. 25.* afferens, se frequentiore exploratione certiorē factum esse, dictam glandulam non ejusdem constitutionis esse cum cerebro aut cerebello, neque cum cæteris corporis partibus glandulosis convenire, neque emissario ductu gaudere, quem & glandulis hepatis denegat *Epist. de Fabr. Glandul. p. 77.* Nos horum ut & aliorum virorum arte anatomicâ præstantissimorum controversiam de glandulæ uti hujus, ita & quarumvis in corpore nostro notione nostram non facimus, utpotè quibus, ut verum fateamur, non omnino cognitum atque exploratum est, quid propriè sit glandula, & in quo ab aliis corpusculis minoribus vel rotundis vel ab hac figurâ deflectentibus specificè differat, quare nobis sufficit eam usitatâ hætenus appellatione glandulam nuncupare, Benevolum Lectorem ad *Cel. Ruyschii Epist. de Fabr. Glandul. in corp. hum.* modò citat. & *Clar. Heisteri Diss. de verâ Glandulæ Appellatione* remittentes. Interim verò autopsia comprobabat hanc eandem è subjectorum idiosyncrasiâ multum variari, ita ut nunc mollior, nunc durior existat, nunc verò nullam glandulæ speciem intuentibus offerat, uti *Hartmannus E. N. C. Dec. II. ann. 10. obs. 161.* demonstravit.

THESES. VIII.

MEMBRANA investitur tenuissimâ, quæ piæ matris & membranæ plexûs choroidei portio est, illâque veluti capsulâ includitur, nunc rubicundi, nunc sublutei coloris, durâ verò matre destituitur, quam ob causam, *III. Lancisus loc. cit.* solidè explicuit, hanc qui-

quidem satis crassam esse vult Frid. Ruyschius cum glandulæ magnitudine comparatam, quod tamen non impedit, quò minùs in se spectata tenuis pronuntietur. Modò allegatam tunicam copiosa vasa sanguifera, nempe arteriolæ & venulæ perreptant, à quibus plures furculi exiles ipsam glandulam subeunt. Illas, quæ per superficiem excurrunt *lib. cit. fig. 5.* expressit *Lancisius*, & materiâ coloratâ repletas exhibuit suprà citatus *Ruyschius Thes. Anat. X. pag. 13.* Arteriolæ à ramis arteriæ cervicalis pullulant, venulæ verò ex hoc corpore emergentes in sinum quartum desinunt. Ipsa hæc vascula piâ matre stipata maximè superiùs glandulam hanc obtegunt, atque ita involvunt, ut relictis illis ea in conspectum vix veniat, iisdem verò remotis sæpè simul auferatur. Neque nervis destituitur, quos *Lancisius* his verbis describit: Ab ipsius basi utrinque egredi animadvertes duos nervos insignes, quos nonnulli processus medullares appellârunt, hos, si transversim juxtâ glandulæ basin incideris, pulchrum tibi spectaculum exhibebunt; videbis enim quasi duos ocellos circumducto subrubro cortice micare candicantes, quos per microscopium visos *loc. cit. fig. 5.* exhibet. *Sylvius* nerveos quosdam funiculos, & *Warthonus* duos ei tribuit, utrinque unum, ab ipso medullæ spinalis exortu oriundos sed exiles. *Joh. de Muralto* ab ejus parte anteriore & posteriore quatuor radices medullares in ejus substantiam assumptas in milvo vidit, quæ è pluribus filamentis nerveis in unum funiculum congregatis conflatæ sunt. Vid. *E. N. C. Dec. II. ann. 2. obs. 29.* Verùm horum demonstration-

strationem difficilem judicat *Isbr. Diemerbr. lib. 3. cap. 6.* nec quemquam eo loco facile villos nervos dignoscere, putatque ramulos minimarum arteriolarum tanquam exiles albicantes fibrillas in incumbentis fornicis natium testiumque, ut & glandulæ pinealis substantiam emissos Authores hosce decepisse, ab iisque ob colorem albicantem pro nervis venditatos esse. Cui contradicit *Lancisius lib. cit.* neque fallaciam oculorum, inquit, suspicaberis, quod vidisse putemus nerveas quoque fibrillas per tenuem glandulæ pinealis meningem dispergi, uti enim constat sanguinea vasa vix cranium ingressa variis nervis associari, ita dubitare non debemus, quin, quod ipsa sanguifera infra cerebrum producantur, nerveos pariter villos secum deferant, & quod pertingunt, insinuent. Præterea & vasa lymphatica in conario nostro Idem annotavit, & *Corvuper, Anat. Corp. Hum. App. tab. VII. fig. 31.* adducentia è plexibus choroideis, abducentia verò per infundibulum ad glandulam pituitariam. Uti & *Ant. Nuck. Adenogr. cur.* lymphæductum ex illâ eodem modo, ac aliis glandulis exeuntem vidit.

THES. IX.

Quod tandem Usus Glandulæ nostræ Pinealis attinet, varias de illo opiniones sovent Authores, quas velut in compendio nobis exhibet *Isbr. Diemerbroek Anat. lib. 3. cap. 6.* & *Thom. Bartholinus Anat. l. 3. cap. 6.* Non minùs *Laurent. Donckers Tr. de morb. puncticul.* de nobilitate & officio ejus prolixè differit, quorum præcipui huc redeunt. Primo hanc glandulam liquorem aliquem serosum vel lymphaticum aut

excipere, aut à ventriculis cerebri acceptum à massâ sanguineâ sequestrare, adeòque simili cum aliis glandulis præprimis plexûs choroidei usui destinatam esse; cui opinioni adslipulantur *Franc. De le Boë, Sylvius Disp. Med. IV. §. 35.* qualis autem is sit, quemve usum habeat, valdè dubitat. Eiusdem opinionis quoque sunt *Raym. Viosanus. Neurogr. Univ. lib. 1. cap. 17. Nic. Hartæcker Cont. Conject. Phys. Disc. V. §. 79.* cujus liquoris pars subtilior per laxos membranæ eam obducentis poros transfluit, & tertii ventriculi nec non infundibuli interjectu ad glandulam pituitariam mandatur, crassiore à lymphaticis aut venosis quibusdam vasis in quattum sinum desinentibus reabsorptâ. *Conf. Hist. Acad. Reg. Scient. quæ Parisiis est, anno 1705. pag. 71.* Ab his non multùm abludit *Th. VVarthoni* placitum, quo *Adenogr. cap. 23.* vult, eam præter humorem ab arteria ablatum, excrementitiam quoque humiditatem à nervulis suis prolectam auferre. *Secundò* glandulam conoidem in minimis utriculis suis non tam lympham, quin potiùs peculiare nervorum liquidum ope arteriolarum eò advectum à M. S. separare, ac proinde peculiarem pusilli cerebelli corticem constituere, quod placitum primus, quantum novimus, in medium protulit *Ill. Lancisius Diff. supra cit.* proinde eam non injuriâ cerebellum ipsius cerebri appellari posse arbitratur. *Tertiò* conarium plexûs choroidei gratiâ conditum esse haud pauci contendunt, quem eo saltem in loco, in quo sita est, sustentat atque peculiari quadam ratione fulcit, inter quos recenseri meretur *Thom. Villisius Anat. cerebr. cap. 14.*
qui

qui annotavit, eâ in hydrope cerebri, radicibus à nimio madore laxatis & non rarò abruptis, loco suo dimotâ, plexum choroideum ab expansione propriâ collabi ac inferiùs subsidere. Sic & *Joh. Riolanus Anthropogr. lib. IV. cap. 2.* item *Joh. Veslingius Syntagm. Anat. cap. 14.* illud sive valvulæ, sive firmandi plexûs choroïdis munere defungi asserunt. Quartò præ aliis in vulgus ferè nota est Renat. Cartesii ejûsque Affeclorum, Meyssoneri, Regii, Hogelandi, de la Forge & Craanii opinio, qui animæ rationalis sedem in hac glandula velut in palatio collocant, eamque ob causam in medio ferè cerebri & ventriculorum sitam esse volunt, ut, referente *Thom. Bartholino loc. cit.* Primò omnium objectorum motus excipere, Secundò sensibilia externa & omnes ideas, quæ à quinque sensibus proficiscuntur, tanquam in centro apprehendere & discernere, atque dein ejus ope spiritus ad varios nervos mittere queat; sicut in speculo sphærico exili omnia eo ordine recipiuntur, quæ vel in campo vel in museo sunt. Quod placitum suum prolixè deduxit *Tr. de Homin. part. 5. & de Passion. Anim. Art. 31. & 32. & part. 11, Epist. 36. & 50.* ubi ita inquit: rem accuratè examinando mihi videor evidenter cognovisse, partem eam corporis, in quâ anima exercet immediatè suas functiones, nullatenùs esse cor, neque etiam totum cerebrum, sed solummodò maximè intimam partium ejus, quæ est certa quadam glandula admodum parva, sita in medio substantiæ ipsius, & ita suspensa suprâ canalem, per quem spiritus cavitatum cerebri anteriorum communicationem habent cum spiritibus posterioris, ut minimi

motus, qui in illâ sunt, multum possint ad mutandum cursum horum spirituum, & reciprocè minima mutationes, quæ accidunt cursui spirituum, multum inserviant mutandis motibus hujus glandula; rationem addit, quæ ipsum movit, ut crederet animam non posse habere in toto corpore alium aliquem locum præter hanc glandulam, in quo functiones suas immediatè exerceat, quæ est, quod non nisi unam & simplicem cogitationem unius rei eodem tempore habeamus, adeoque necessarium sit, dari aliquem locum, in quo imagines, quæ à gemino sensu veniunt, in unum, antequam ad animam perveniant, convenire possint, nullam verò in cerebro partem, præter glandulam pinealem, unicam esse atque simplicem, ad quem usum præstandum conica ejus figura & non levis mobilitas symbolum suum conferre ipsi videtur; cui opinioni præ aliis patrocinator *Joh. de Muralto in E. N. C. Dec. 11. ann. 2. obs. 29.* eâ inductus ratione, quod organo hoc læso & ratio in homine lædatur, imò glandulam hanc vel tantillum læsam derepentè & uno quasi ictu hominem trucidare; addit experimentum ab *Artheaud Chirurgo & Anatomico Lausannensi* institutum, quo stilum per medium cerebri ad glandulam usque in canibus traduxit, quod verò & factu difficile & judicatu impossibile est. A *Cartesio* non multum abludit *Henr. Regius Prax. Med. lib. 1. cap. 12. Joh. Broen Med. Theor. pag. 52. & Theod. Craanen in Henr. Regii Prax. Med.* illam sensorium commune esse, inque eâ solâ non verò in ullâ aliâ corporis parte animam existere statuentes.

THES.

THES. X.

Quam de animæ sede sententiam non pauci convellere nec infelici cum successu conati sunt, scilicet *Thom. Bartholinus loc. cit.* multis argumentis contrarium stabilit; *Ducan. Tr. de Action Animal.* nec non *Thom. Villisus loc. cit.* quorum præcipua sunt: quod

1. nimis exile corpus sit hæc glandula, & ridiculum, animam uni eique tam exiguæ parti incarcerare velle.
2. In istâ idearum diversarum confusio fieret.
3. Species omnium sensuum huc non appellant, quia nervi ex organis sensorii ad eam usque non extenduntur.
4. Quod, uti Fontanus objicit, illa à cerebri centro longius absit.
5. Nullus ductus ad nervos apertus aut cognitus abeat.
6. Hæc glandula in animalibus ratione destitutis major quàm in homine deprehendatur.
7. Absõnum sit statuere, animam rationalem in homine in consimili diversorio cum illâ brutorum hospitari.
8. Nunquam in eâ visus sit motus proprius, etsi vel maximè esset, hæc ejus mobilitas à statu p. n. lapidescente tolleretur.
9. Ei tanquam glandulæ hæc prærogativa nullo modo competat.
10. Eadem sine rationis aut aliarum animi functionum læsione magis vel minùs petrificata quandòque observetur. vid. *Diemerb. Anat. lib. III. cap. 6.* de quo statu p. n. infrà dicetur.
11. Dubium quoque movet observatio, quæ extat in *Act. Anglic. ann. 1667. Mens. Jun. §. 3.* quæque dogmati Cartesiano grave vulnus inflixisse perhibetur. Quas objectiones diluere omni ope conatur *Lud. de la Forge Not. ad part. 5. Cartes. Tr. de hom.* Tandem *Joh. Mar. Lancisus lib. cit.* ut convellat præcipuum hujus

Philosophi fundamentum : nempè conarium animæ sedem esse, eò quod, cum reliquæ cerebri partes duplices sint, hoc unicum atque simplex observetur, alium in cerebro locum, in quo conditiones a Cartesio requisitæ luculentius quàm in conariâ suâ glandulâ conveniunt, assignat, nempè corpus callosum cum fornice septoque lucido. *Henr. Ridley Anat. cerebr. cap. 10.* fusiùs explicat, quid occasionem Cartesii errori præbuerit, rectèque judicat, sublimem ejus philosophiam meritissimèque mirabilem existimatam, longè utiliore indubitanter fuisse, si in dissectionibus magis versatus fuisset, minùs verò in invisibilibus. Liceat addere judicium *Thom. Bartholini cent. IV. Epist. 57.* de memorato tractatu latum, nempè opus illud ingeniosius esse, quàm verius; Alius censet hunc Philosophum in nullo alio scripto se hominem esse magis ostendit, quàm in tractatu de homine. Idem ferè sentiunt *Uratislaviens. Morb. Hist. Collect. Tr. de experient. cap. 2.* totum Cartesii hominem diversum ab aliis hominibus esse lepidè judicantes. Rectè itaque *Ant. Nuckius* exequias hujus glandulæ ceu animæ sedis cecinit, cum inscriptione quâdam pro Epitaphio inserviente, quam vid. *in Epist. Anat. de invent. nov. Adenogr. annexa*, non nisi lymphæ cerebri secretionem eidem relictâ. Neque litem cuiquam movebimus, qui cum *Isbr. Diemerbr. loc. cit.* usum ejus satis ignotum, obscurum & non nisi conjecturis incertisque rationibus suffultum pronunciare velit, qui non inficiamur, cerebri quidem officium generale non latere, specialem verò uniuscujusque partis, seu multiplicium

plicium protuberantiarum, cavitatum & hiatusum, processuum item & tractuum functionem, paucis exceptis, minùs cognitam esse atque perspectam.

THES. XI.

Quibus præmissis, ad institutum nostrum propiùs accedimus de statu glandulæ nostræ præternaturali quædam subjuncturi; non autem in genere de eo agere constituimus, neque ea, de quibus suprà jam dictum, repetere, nempe conarium quandòque vel re ipsà deficere vel deesse videri, aut idem magnitudine excedere aut etiàm deficere, non minùs colorem aliquandò obscurum, vel magis cineritium, vel alium peregrinum intuentibus exhibere. Hujus paucis mentionem hic faciamus, istam glandulam quandòque fero infarctam, tenaci item ac viscosà materiâ obsesam esse, adeò ut quasi sepulta ac vaginata in cadavere Horatii Albani visa fuerit. vid. *E. N. C. cent. 3. & 4. p. 10. app. Ill. Morgagnus Advers. Anat. VI. Animadv. 9.* eam æquè ac glandulas plexûs choroidis aquâ turgidam non modò ipse vidit, sed in Patavino etiàm Theatro aliquoties ostendit, qualis in hydrope præprimis cerebri conspicitur, non tam mali causâ quàm effectûs. Putridam & penè consumptam conspexit *Ant. Nuckius Epist. Anat. de Invent. nov.* item *Theod. Craanen obs. in Henr. Regii Prax. Med.* eam in Catalepsi fortuito catarrho obsideri asserit. Verbo addimus, glandulam nostram plerisque morbis, quibus reliquæ expositæ sunt, haud rarò affici, quas *Thom. VVarthonus Adenogr. c. 39.* recensuit.

THES. XII.

Præ aliis verò vitiis sæpiùs lapidescit glandula nostra, seu materiam calculosam, tartaream aut tophaceam magis minùsve in sinu suo gerit, ut nunc fabulosa tantùm, nunc lapidea magnâ ex parte appareat. Et hoc cum multis aliis glandulis commune habet. Quis enim, qui sectionibus Anatomicis interfuit, nescit, glandulas mesenterii æquè ac bronchiales, thyroideas item ejusmodi substantiâ non rarò obfessas esse? de pituitariâ idem annotavit *Brunnerus in Schediasm.* quod de illâ nobis reliquit, nempè eam in homine quandoque sabulo esse conspersam, uti tubulos urinarios Bellini in renibus; quin & totum cerebrum, quod fidem superat, aut saltem potioremem ejus partem in bove petrefactam exhibet *Hist. Acad. Reg. Scient. Paris. 1703. p. 32. & Act. p. 314. E. N. C. Dec. I. ann. I. Obs. 26. Th. Bartholinus Cent. VI. Hist. Anat. 91. item Cent. 111. Epist. 8.* quod observatum dubium reddit Ant. Vallisnerius, aliamque & à cerebro diversam fuisse concretionem fortuitam sibi aliisque persuadet in *Exper. circa opinat. cerebr. petref.* In arteriis *Tulpius lib. 11. Obs. 25.* in prostaticis, utut rariùs, calculos. *Schenkius lib. IV. obs. med. 37.* annotârunt. Non minùs materia calculosa in variis cerebri locis reperta fuit, scilicet in dextro ejus ventriculo anteriore vid. *Theod. Kerckring. l. c. obs. 35.* in nervis opticis *Blegny Zodiaca. Med. Gall. ann. I. Obs. 14.* in postica capitis parte sub futurâ lambdoide inter duram & piam matrem *Fabr. Hildanus Cent. I. obs. 11.* Sic & *Joh. Schenkius* lapidem magnitudine & formâ mori coloris cinerei in cere-

cerebro civis Lipsiensis à D. Pfeil inventum & pro singulari miraculo multis ostensum refert *lib. 1. obs. 81.* ubi & alias similium calculorum observationes allegavit. Similem substantiam in duræ matris facie internâ cerebrum comprimentem superiore anno in Theatro nostro Anatomico vidimus. Nemo autem, uti opinor, mirabitur aliquas corporis nostri partes vel omninò vel ex parte lapidescere, quicunque sibi in memoriam revocat, totum corpus, præprimis Embryonis à diuturnâ in utero vel extrâ eundem morâ in lapideam ejusmodi substantiam tandem mutari, quod ipsum Historiæ Lithopædiorum, scilicet Mussipontani à Laurent. Straussio & Ant. Deusingio, item Senonensis à Joh. Albasio & Sim. Provancherio descriptorum satis superque testantur. In glandulâ verò nostrâ id ipsum frequentius contingere plures utique observationes fidem faciunt: nempe illam vel ex parte vel etiam ob exiguam ejus molem ex toto ferè lapidescere, è quibus præcipuas in medium proferre instituti nostri ratio postulat. *Ill. Morgagnus loc. supra cit.* istam ferè totam è duriusculâ, sed friabili materiâ constantem in viro quodam Bononiensi, & *Raym. Viosanus Neurogr. lib. 1. cap. 2.* intrâ illam exiguum corpus durum, subflavum, & non nihil asperum sæpiùs deprehenderunt, non minùs *Cel. Ruyschius Thes. Anat. V. nr. 36.* tria corpuscula in hac glandulâ reperta & ab aliis pro calculis habita, sibi verò officula visa in museo rerum anatomicarum rariorem locupletissimo olim asservavit, & *tab. 3. fig. 5.* depingi curavit.

THES. XIII.

Plurès alii corporis humani Scrutatores eundem statum præternaturalem observaverunt atque diversimodè descripserunt. *Edm. King in Act. Angl.* 1686. *Mens. Decembr. pecul. relat. de glandul. pineal. petresc.* eam firmam ac pulchram, probèque coloratam primo intuitu quidem, exactæ etiam figuræ ac mensuræ ordinariæ, sed totam in lapidem versam, membranâque involutam deprehendit, fateturque se nunquam simile quid inaudisse aut in cerebro dissecto conspexisse. *Joh. Bapt. Contulo Med. Bonon.* referente, *Berlingerius Gipsæus Profess. ibidem* in cerebro ægri præternaturali capitis figurâ dotati ac è continuâ cephalalgia denati hanc glandulam totam petrosam vidit. *Cl. Vesti Obs. Med. rar.* 1. lapillis viridibus refertam. *Ant. Nuckius Epist. Anat. de Invent. nov.* eam totam calculosam, seu quatuordecim diversæ magnitudinis & formæ calculis duriusculis obsessam conspexit, quibus glandulæ mobilitas, si mobilis unquam fuit, sublata erat. *Stalp. van der VViel obs. rar. cent. I. obs. 12.* lapillum magnitudine grani cannabini exhibet, qui insuper in schol. plures aliorum observationes similes recensuit. *Paul. Barbette Anat. Pract. lib. 11. cap. 2.* non rarò calculos duos aut tres, imò quatuor aliquandò se vidisse notat, referente *Blasio in Vesling. Anat. cap. 14.* *Sylvius* pariter diversis vicibus arenulas & semel exiguum subrotundum calculum pisi quartam partem æquantem, qui plusquam dimidium glandulæ occupaverat, *Schenckius* alium plusquam dimidiæ glandulæ occupantem, *Dionis Anat. Demonstr. 7.* exiguum quendam lapil-

lapillum se reperisse perhibent. *Regn. de Graaf de Succ. pancr. cap. 7.* in illâ plusquam vigesies in hominibus tam lento morbo, quam violentâ morte extinctis, frequentius tamen in Galliâ quàm in Pataviâ, calculos se reperisse affirmat. Idem in *E. N. G. Dec. I. ann. 1. obs. 127.* plurimas arenulas asperas, quarum aliquæ calculi nomen propter magnitudinem merebantur, exhibuit, & *Cent. IX. & X. obs. 63.* tres calculos minimos vel potiùs arenulas crassiores subflavas, sabulum scorbuticum vasis urinariis adhærens referentes in nautâ invenit *Laubinus*, & *Job. à Meckern Obs. Med. Chir. c. 58.* duos icone exprimi curavit. *Thom. Bartholinus Cent. III. Epist. 97.* aliquot arenulas durissimas & pellucas in icterico intuitus est. Alia hujus rei exempla, nè historias plures cumulemus, hinc indè annotata legimus, præsertim in *Franck de Franckenau Diss. de Lapidinâ Microcosmicâ.* Præ aliis vero memorabile est, quod *Carol. Drelincurtius Joh. Jac. Manger* communicavit, quodque observaverat in virgine 20. circiter annorum, quæ postquam dirâ cephalæâ semestri discruciatâ fuisset, ac tandem occæcata, reliquisque deinceps sensibus orbata, in mediis planctibus mortem obierat, cui scilicet pinealis glandula non tantùm saxea fuit, sed etiam ad ovi gallinacei amplitudinem excreverat; quâ suâ mole nervorum opticorum thalamos, nec non reliquos tandem nervos lethificè compressit, vid. *Manger. Theatr. Anat. L. IV. cap. 2. p. 309.* Hoc unicum addere liceat, quod anno superiore 1730. hic loci in Theatro Anatomico lapilli satis notabiles in duobus subjectis,

& anno præcedente in alio reperti fuerint , non multum friabiles & magis minusve flavescentes. Plura concretionis hujus præternaturalis exempla à nobis proferri possent , nisi hæc jam allegata sufficere nobis persuasum esset.

THES. XIV.

Quâ jam ratione , & quibus de causis dura hæc & præternaturalis substantia in glandulâ pineali generetur , paucis annotandum erit. Quod dum facimus , non quidem ætiologiam hîc prolixam proferre , rationibusque & experimentis stabilire animus nobis est , utpotè quæ in pluribus numero scriptis occurrit , quâ nimirum ratione calculi in renibus , in vesicâ urinariâ & vesiculâ felleâ , in liene , item in glandulis thyroideis , bronchialibus , mesenterii , & tantum non omnibus ferè corporis partibus proveniant , quorum natales utique ducendi sunt à particulis salinis fixis atque terrestribus , accedentibus glutinosis & mucilaginosis , à reliquis fluidis sequestratis atque tunitis , sibi-que invicem ob specificam gravitatem & homogeneitatem adeò arctè cohærentibus , ut in ejusmodi corpus durum coalescant. Cæterum naturæ familiare esse solidum in liquido & durum è molli generare exemplis rarioribus Diff. de ossific. p. n. probatum ivimus. Quin potius aliqua de illis , qui in variis cerebri partibus generantur , memorabimus. Sanguis modò dictis particulis salinis & terrestribus imprægnatus , uti ad alias corporis partes , ita quoque ad cerebri confinia mediante cordis motu propellitur , ab eoque serositates , quibus imprægnatus est , ibidem sequestrantur , & quidem majori in copiâ , quàm

quàm in multis aliis partibus, quæ vel in ipsâ substantiâ ejus hærent, vel in ventriculis maximè anterioribus colliguntur: præterea nobilissimum hoc viscus, utut vasculis innumeris abundet, paulò frigidioris temperiei esse videtur, unde fit, ut dictæ serositates faciliè inspissentur, & fluxilioribus secedentibus, salinæ atque terrestres in concretum lapideum coëant. Quia verò glandulam pinealem seri vel lymphæ secretioni inservire supra adstruximus, & hic liquor particulas potissimum salinas atque terrestres in sinu suo gerit, aliquo modo concipitur, quâ fiat, ut non modò æquè faciliè, uti in aliis cerebri partibus, sed & frequentius materia lapidea in eadem generetur, haud rarò etiam parvum hoc corpusculum ob exilitatem, & si omnes ejus pori infarcti fuerint, totum quantum in duram ejusmodi substantiam immutetur. Dum autem hoc asserimus, lubentes fatemur, hanc de ætiologiâ phænomeni nostri conjecturam veròsimilem quidem esse, nobis verò & forsan etiam Ben. Lectori non in omnibus satisfacere, seu, ut clariùs loquamur, rationem sufficientem allegari vix posse, cur hæc glandula frequentius lapicidinam, utut exiguam veluti referat, quàm aliæ cerebri partes, quæ serositatibus non minùs copiosè irrigantur. Quod verò lymphæ in ventriculis cerebri anterioribus contenta non æquè concreascit, tum plexus choroidei ibidem hospitantis calori à sanguine oriundo, tum etiam faciliori seri in poris & ductibus, quàm in cavitate coagulationi adscribendum esse videtur.

THES. XV.

Cum verò à statu hoc p. n. sapiùs memorato varia utique symptomata oriantur, eorum quoquè men-

tio paucis facienda erit. Equidem Isbr. *Diemerbræck loc. cit.* asserit, se ab istorum calculorum inventoribus nusquam observatum legisse, illis, in quorum cadaveribus tales calculi in hac glandula reperti sunt, in vitâ quicquam incommodi circâ animales actiones contingisse, quod verò cum ratione pariter ac experienciâ pugnare videtur, quæ varia nobis exhibent. Quorum primum est dolor capitis intolerabilis & pertinacissimus, quali civis ille Lipsiensis à Joh. Schenkio memoratus per longum temporis spatium excruciatu fuerat, ita ut dies noctesque nullam prorsus quietis partem capere potuerit; qui dolor fixus est, & cum gravitate totius capitis conjunctus, nullisque remediis cedit, referente *Dan. Sennerto Prax. libr. 1. p. 18.* Præterea æger, cujus *Edm. King in Actis Anglicanis* meminit, sibi de fatuitate, mentisque ab alienatione quàm maximè metuebat, nec sine causâ, antequam enim moreretur, facultatibus rationalibus omninò destitutus apparuit, & titubans multoties humi prostratus fuit, aliaque peregit, quæ mentem minùs sanam esse demonstrarent. Non minùs virgo, cujus ex observatione *Drelincurtii* suprâ §. 13. meminimus, non modò dirâ cephalæâ semestri afflicta, sed & occæcata ac reliquistandem sensibus orbata fuit. Pariter *Theod. Kerkringius Med. Amst. Spicil. Anat. obs. 35.* puerum 14. annorum, in cujus, uti suprâ memoravimus, anteriore cerebri ventriculo dextri lateris calculum reperit, nullam verò glandulam pinealem deprehendit, stultum quasi, semper somnolentum & capite obtuso fuisse recenset vid. *E. N. C. Dec. 1. ann. 1. obs. 29.* Quæ sympto-

symptomata Cartesio ejusque Affeclis non parùm patrocinari videntur, partim etiam non videntur, quodsi enim statum ejus p. n. functiones rationales labefactare experientia comprobatur, argumentum inde sumunt confidentiùs stabiliendi, hanc glandulam utiquè animæ sedem esse; in eo verò iisdem contraria sunt, quod ab hac constitutione p. n. dictæ functiones non omninò sublatae fuerint, sed aliquatenùs viguerint, quod tamen fieri debuisset in glandulâ vel omninò vel magnâ ex parte petrificatâ. Equidem huic difficultati respondet *Lud. de la Forge Not. ad Cartes. Tr. de homin. part. 5.* his verbis *Fortassis adjiciat quis Bartholino patrocinator, Sylvium reperisse arenam lapillumque in istâ glandulâ: Sed nullius hoc est momenti, quippe illa non desineret esse sedes animæ, quamvis ipsius corpus degeneraret in lapidem, dummodò iste lapis poros habeat satis amplios, sufficientesque ad præbendum spiritibus transitum.* Et paulò post idem subjungit: *Quamvis nullum tale corpus proprium, quale est ipsius glandula, in glandula loco esset, atque nihil aliud esset nisi locus, in quem se exonerant arterie plexûs choroidis, nihilominùs tamen hic locus non desineret esse sedes animæ.* Quæ à modò allegato Forgio nimis audacter pronunciari æquus Lector facillè judicabit.

THES. XVI.

Quamvis autem nullatenùs animæ sedem in glandulâ nostrâ collocemus, neque eam spirituum animalium receptaculum esse contendamus, neque aliam eidem prærogativam præminentem concedamus, hoc tamen quivis intelligit, statum ejus præternaturalem,
uti

uti quemcunque, ita & hunc, de quo actum à nobis
 haftenùs fuit, magnum œconomix animali præjudi-
 cium afferre. Neque huic nostro asserto contraria-
 tur cognita ejus & summa exilitas, quia enim cerebri,
 visceris & nobilissimi & tenerrimi, partem atque veluti
 centrum constituit, à veritate alienum non est sta-
 tuere, constitutionem illius p. n. functiones ejusdem,
 si non omnes, aliquas saltem magis minùsve labefa-
 ctare, prouti major vel minor ejus portio, aut tota
 in calculosam vel lapideam substantiam induruit: po-
 sito enim, istam non nisi sero vel lymphæ à massâ san-
 guineâ sequestrandæ velificari, non potest non fieri,
 quin cessante hac ejus actione, vel sanguinis in plexu
 choroideo vel lymphæ per istam motus aut seque-
 stratio plùs minùsve turbetur. Quin si præter duri-
 tiem insuper extraordinariam in molem excrevit,
 eminentias vicinas, atque tractum medullarem trans-
 versum hisce antepositum non modò, sed & nervos
 adeò comprimit, ut spirituum animalium influxu in-
 tercepto, funesta symptomata superveniant, uti id su-
 prà recensitæ observationes manifestant. Quare optan-
 dum utique est, ut, quemadmodum mens sana, ita
 & hæc glandula salva rectaque in corpore sano
 nunquam non existat.

F I N I S.